

1 Peter

Peter-wenh pip namp 1, rarlingkwernew akngerrew

Angka nhenhan alakenh aynteyel

Jesus rarling anenh ahern nhenh-itwew, ranap kwertengerl-rnem 12 rlwanew. Anyent itna Peter. Ranap anenh Jesus-itwew, intem renh iterlarenh. Ra pip atherr ingkwernew, rap thwenew Christian akngerrew apmer ingwer-rnem-warling. Pip nhenhanap namp 1-arling. Jesus ranap awankantey aney-alpew Akngey-itwel, aherrety 30-el apek, Peter-elarling, pip nhenhan ingkwernew.

Ikwereng-arey akngerrel Christian-rnem irrwernenharling, renh-rnem irrwampenh-anthenh, ingwer-rnemelan renh-rnem ipmew-anteyarling atwenh. Akngerran anenh atererremel alpwey-then. Peter ran iterrenh alakenh-anyem: “Rerneman atererrey-angenh arnkaty anemer.” Alakenh pip nhenh ra ingkwernew, rernem rlterrk aneyew inkwerelhemel. Ran renh-rnem ilew, “Aleth Jesus apent-aynteyew. Iterl-araynteyew, Akngey ran mwerr. Ranap aleth ikwerenh-rneman arntarnt-arayntem.”

Pip nhenhel ra ilew alakenh-anyem:

Alpwelyerrey-angenh anaynteyew.

Apmwa apetyenty, rlterrk-antey anaynteyew.

Akngeyan ilkelheyel, anantherran rlterrkaring anaynteyew Jesus-apeny.

Jesus ranap awelhenh Akngeyewant.
 Ingwer-rnemelarl renh irrwernenh, Jesus-
 an aleth anenh arraty-angkwarrarl mwerr-
 angkwarr-then.

Ingwer-rnemelan angka apmwangkwarr
 akalty-anthenh, arraty-wenyarl. Christian-
 rneman awelhey-angenharl angka yanhew.
 Ingwer-ingweran Jesus ranap apey-alpeyenh.
 Rernemanap ikwer mpwelheyew, arraty-
 angkwarrarl anaynteyew.

*Peter-el pip nhenh ingkwernew, rap thwenew
 Christian akngerrew apmer arrpanenh-warl*

¹ Ayengaw Peter, atha pip nhenh ingkwerneyel
 angka mwerr-akert. Ayengan artwa warrkenh
 Jesus-wenh. Ran ayenh rlwanew, alhaynteyew
 angka mwerr-angker ikwer-akert ilerlap-
 aynteyew. Alakenhap athan pip nhenh
 thweneyel arrewantherr-warl, apmer Judea-
 theyarl arlperrryerrew-rnem-warl - Pontus-
 areny-rnem-warl, Galatia-areny-rnem-warl,
 Cappadocia-areny-rnem-warl, Asia-areny-rnem-
 warl, Bithynia-areny-rnem-warl-akerr. ² Awank-
 akerran Akngeyan iterrenh, arrenhantherrenh
 rlwaneyew, ikwerenh-rnem anaynteyew ikwer.
 Rap arrenhantherrenh rlwanew ingwer-rnem-
 wety. Inweng ikwerenhel apmwa arrewantherr-
 wety irrarlkwew, arrantherrap aneyel ikwerenh-
 rnem-anem aleyan. Arrantherr angka nhenh
 awew Jesus-wenh, arrantherrap arraty-
 angkwarr-anem aneyel, rarl angkeyel-angkwarr.
 Alakenhan Akngeyel arrenhantherrenh

anyenteleyel ikwer-warl. Jesus-an ilwew, arrngan ikwerenh thelew. Akngeyelan arrenhantherrenh arratyeleyel, inweng-then arrantherr-wenh arrngangkarr irrarkemel apmwewety.

Athan Akngey ayerneyel arrewantherr alakenh-anyem: "Intem ikwer-rnem anaynteyew mwerr-angkarr. Renh-rnem irrngerney-anthaynteyew, rernemaw mwerrant-arey anaynteyew."

Aleyan rlterrk-anemarl, ingwer-ingweran mwerr-anemarl

³⁻⁵ Akngey ran aynikwarl Lord Jesus Christ-wenharl. Ranap mwerr-angker inngarl anewantherr aneyel. Anantherr apmwangkarr alhenh. Aleyanap ra mwerr-angkerarl anewantherr aneyel, anenhantherrenh awakelhey-angenharl. Rap anenhantherrenh itethelem arrpemarl. Jesus ran ilwew, Akngeyelanap renh itethelew. Alakenh-anyeman anantherr iterl-areyel, anenhantherrenhap Akngeyel itethelem arrpemarl. Awankan anantherr ipmapenyarl anenh. Kel alakenh-anyem ikwer-warl angkem: "Ya wenh Akngeyay! Ngan mwerr-angker innga anewantherr!"

Anantherran ikwerenh-rnemarl, rap anenhantherrenh mwerr-angker anthem. Ranap anewantherr mwerr-angker atnyeneyel, anantherrarl ikwer-itwel-anem aney-alpeyenhew intem-antey. Aleyanap anantherr

alerl-antey mpwelheyel ikwer. Mwerr-angker ikwerenhan nthakenh aternggerrey-angenh yanhey, nthakenh apmwerrey-angenh, nthakenh ilperteley-angenh. Akngeyelan arawerrng rlterrk atnyeneyel, anenhantherrenh arntarnt-araynteyew, anantherrarl renh nakeyel, iterremel ikwerant aneyel. Ran anenhantherrenh arntarnt-areyenh, arlternem ywerreyew-atety. Ingkerrelan iterl-areyenharl, rarl anenhantherrenh itethelew.

⁶ Arrantherr iterreyew angka nhenhew, arrantherrap mwerranty irrenh-arey inkwerelhemel. Aleyan rlterrk-anem arrewantherr apetyeyel, apatemel arrantherr anerl-aneyenh alpwelyerremel. Arrantherrap iterreyew, nthakenh-anem irreyenh yanhenhan, arrantherrap irrngerney-anemarl inkwerelhemel innganem anem. Akngeyelan arrenhantherrenh arntarnt-arem apmwa yanhrnem-wety.

⁷ Apwert mwerr-angker gold-ew iterrenh-arey. Man akngerrel payemelem. Rernem gold ahernthey angernem, rernemap arrtiem rwitwew, renh arrwelthelemel irrarlkeyew. Rwel apwert apmwa arrtiemel gold irrarlkemel. Gold ranap nthakenh ampey-angenharl, arrangkw. Ahern-then apwert-then ywerrenhem, gold-ant irlwart aneyelpem. Alakenh-anyemap Akngeyel arrenhantherrenh arrkerneyel, arrenhantherrenh rlterrkelemel, gold-arl rwitwew alakenh irrarlkem-apeny. Alakenhap Akngeyan iterreyel: "Inngarlap rernem iterreyel atyeng, apmwa rlterrkarl aynteyel-angkwarr.

Rernemap atyeng irrpeltherrey-angenharl, atyeng-wety intwemelerrey-angenharl.” Ran inkwerelheyel arrewantherr, arrantherrarl rlterrk aneyelewan. Rap arrenhantherrenh nakeyenh, Jesus-arl apey-alpeyenhelan ahern nhenh-warl.

⁸⁻⁹ Arrantherran Jesus arey-angenh-antey, rarl anenh ahern nhenh-itwew, arrantherrap ikwer artewenty ilkelheyel. Aleyanap renh arey-angenharl anngel, arrantherrap renh iterl-areyelarl. Arrantherrap iterl-areyelarl, ran arrenhantherrenh itetheleyel ipmewety, arrantherr alpeyew, ikwer-itwel aney-alpeyew intem-antey. Ran arrenhantherrenh irrngerney-antheyel. Aleyanap arrantherr innganem irrngerney aneyel.

¹⁰ Awank-akerran artwa angkakert Akngeywenh-rnemelan angka nhenh ilerl-apenh. Rernemap alakenh iterrenh, “Akngeyanap inkwerelhemel aneyenh ikwerenh-rnemew, ingkern-penharl anerl-aneyenh-rnemew. Nthakenharlap ra renh-rnem intem-antey itetheleman? Angwenhel renh-rnem itethelem? Ilenger?” Rerneman iterrenh rlterrk-angkwarr angka ikwer, Akngeyelarl renh-rnem ilenhew.

¹¹ Inngarlap ran Jesus-wenh inwengelan angka nhenhan ilenh, rernem pip-warl ingkwerneyew: “Ingwer-rnemelan Jesus renh artewenty inngey irrwerneyenh, ranap amentarl ilweyenh. Akngeyelanap renh atyetyart ilkwanem mpwareyenh. Ingwer-ingweran Jesus ranap apetyeyenh ahern nhenh-warl, ikwerenh-rnem itetheleyew ipmepenh.” ¹² Inwengelanap renh-

rnem ilenh, “Anewantherrenh ingkern-penh-rnemelant renh areyenh.” Ya, arrewantherrant angka nhenhan ingkwernew artwa Akngey-wenh-rnemel. Angka yanh ikwer-rnem ilenh-penh, Inwengelan arawerrng anthew irrwerlthey ingwer-rnemew rlengkeny-rnemew-then, rernemaw angka Jesus-akert ilaynteyew. Antyerl-rnem-then ilkelheyel, akaltyerreyew angka mwerr-angker nhenhew.

Akngey-angkwarrant anaynteyew, menty ipmeyew apmwangkwarran

¹³ Arrantherran ingkerrenh mwerranty aneyew mwerr-angkwarr, Akngeyewant awelhemel ikwerant. Aleth-antey ikwer iterremel anaynteyew. Aleth-antey ikwer mpwelhaynteyew, Jesus ra apetyeyew-atety. Arlta yanhelan Jesus rarl apey-alpeyenhel, ingkerrenhelap renh areyengan. Akngey rap inkwerelheyen arrewantherr ingkerrenhew. ¹⁴ Awankan arrantherr Akngey iterl-arey-angenh anenh. Alakenh arrantherr apmwangkwarr anengan. Apmwa yanh-angkwarr ipmenharey, menty. Akngeyew awelh-aynteyew, away aynikw ikwerenharl awelhem-apeny. Ikweren-angkwarr mwerr-angkwarr anenh-arey. ¹⁵⁻¹⁶ Akngeyel arrenhantherrenh rlwanew, ikweren-rnem anaynteyew. Arrantherrap alakenh-anyem ikwer-apeny aneyew. Akngey ranap pwek ikwerenhel ilelheyel: “Ayengan innga arraty aneyel. Athap apmwangkwarr apentey-angenh aneyel. Irrkaty-angkwarr arrpemarl arrantherran mwantyel aneyew,

mwerr-angkarr anemel. Akngeyan mwerr-anker inngarl. Aleyanap arrantherr anaynteyew irrkaty-angkwarr-antey ikwer-angkwarr.”

¹⁷ Arrantherran Akngey-wenh ampernemar. Arrantherrarl ikwer-warl angkeyel, arrantherrap renh “Akngey” antwemar. Ranap ingwer-rnemew-then inkwerelheyel. Ra irrkaty-angkwarr ingkerrenhew ilkelheyel, lipwel. Rarl ingkerrenh ayernem, rap renh-rnem ayernem irrkaty-angkwarr arrpemar, angka ikwerenhelarl ileyel-angkwarr. Arrantherran arwa alyepel aneyel ahern nhenh-itwew, intemweny, alethang-rnem-apeny. Ingwer-ingweran arrantherrap irrwerl-itwew Akngey-itwel aney-alpeyenh ikwerenh-rnem-itwew. Alakenh-anyem arrantherr aleth iterr-aynteyew ikwerew, mwanty arraty-angkwarr-antey anaynteyew, ra arrewantherr awakelhewerr.

¹⁸ Arrantherr iterl-areyel, arrantherrarl arrwekeleny-rnem arrewantherrenh-rnem apentenh, rernemarl arrenhantherrenh akalty-anthenh. Arrantherrarl arrwekeleny-rnem-angkwarr apentenh, nthakenh aleth aney-angenharl, arrangkw. Akngey-wenh-angkwarran mwerr-angkwarrarl, arraty-angkwarrarl. Aleyan arrantherr mwerr-angkwarr ikwerenh-angkwarr apenteyel. Ra arrenhantherrenh itethelew angka arrwekeleny-rnem-wety, mwerr-anem mpwarew. Nthakenharlap ra alakenh-anyeman mpwarew? Ra apek man payemelew, fine-apeny? Arrangkw! Man ra ahern nhenh-

arenyarl, rap ingwer-ingweran ywerremarl, arrangwerremarl.

¹⁹ Arrantherr iterl-areyel, Jew-rnemearl yep-yep akely mwerrantarl atwenh, arntety-wenyarl, Akngey-warl-athek anthaynteyew. Jesus ran yep-yep yanh-apeny pety-angkwarran. Akngey-wenh Alerikw Jesus ranap mwerr-angker arrpemar, apmweweny. Ranap arrnga thelew arrewantherr arwerl iylpeyl-atherr-itwew. Ra arrenhantherrenh manel payemeley-angenh, ra arrnga ikwerenhel payemelenhey-alpew. Alakenh-anyemanap arrantherr Akngey-wenh-anemarl aneyel. ²⁰ Alker-then ahern-then mpwarey-angenhel-antey, Akngey iterrew, ra Alerikw ikweren-antey ahern nhenh-warl thweneyew. Arwa awank-antey ra mpwarew alakenh-anyem, arrenhantherrenh itetheleyew anenhantherrenh-then. Inngarlap ran, Jesus ra apetyew, katy ilweyew anewantherr. ²¹ Alakenh-wety arrantherr Akngey arrer-they-anem iterl-areyel. Akngeyelan Jesus renh itethelew ipmepen, rap renh akngeynew angkep irrwerl-warl, ikwer-itwel aney-alpeyew. Rap renh ilkwanem arrernew, anaynteyew ingkerrenhew. Alakenh-anyemap arrantherr Akngey-angkwarr aneyel. Arrantherr ikwer iterreyel, arrantherrap iterl-areyel, Akngeyel itethelem arrenhantherrenh.

Akngewan mwerrarl aneyel arrewantherr; arrantherrap mwerr arrpemar anaynteyew ingwer-rnemew

22-23 Arrantherranap inngarl angka renh mwerrarl awew Jesus-akert. Aleyanap arrantherr ampa akely rlengkeny anenty-apeny arrpemar. Ranap ingwer-lkwer-anemar. Aynatythen amaty-then anewantherr-wenh nthakenh intem iteth aney-angenh ahern nhenh-itwew, arrangkw. Rernem nthakenh anenhantherrenh iteth intem atnyeney-angenh arrpemar, arrangkw. Aleyan arrantherr Akngey-wenh ampernem-anemar. Arrantherr menty ipmew apmwangkwarr, mwerr-angkwarr-anem aneyel arraty-anem. Mwerr-anem arrantherr ilkelherremel aneyel. Intemar alakenh anayntenh-arey. Angka ikwerenh ranap ywerrey-angenharl, iteth aleth aneyel.

24 Alakenh-anyemar ra aynteyel Akngey-wenh pwek-itwew:

“Antyweran atherrkeny-tangkwel rtneyel, rap arlenyerrem-anem.

Alpeyt-rnem mwerr-tangkwel rtneyel, rernemap arlenyerrem-anem lertnelhemel ahernwarl.

Anantherranap ingkerrenharl alakenh-anyem.

Anantherr nthakenh aleth aney-angenh ahern nhenh-itwew, arrangkw.

Anantherr ingwer-ingweran ywerrem-anemar.

25 Akngey-wenh angkanap nthakenh antywerapeny ywerrey-angenharl, arrangkw. Aleth ra aynteyel.”

Angka nhenhan irrkaty-antey, awank anantherr arrenhantherrenh ilenh-antey.

2

¹ Nhepenh-anyeman arrantherr anaynteyew mwerr-angkwarr, apmwangkwarr-wety ipmel-heyew. Ingwer-rnem-wetyan arlkarrerremel iterrey-angenh, renh-rnem irrwerneyew. Irrtywerremel ilerl-aney-angenh, arraty-angkwarr angkaynteyew. Mwerr-arrpantey anyelkel anerl-aney-angenh. Arweltheney-angenh. Ampwal ingwer-wenh ayntengenyew iterrey-angenh anaynteyew. Ingwer-rnemew tyel-angkey-angenh. ² Arrantherr Akngey-wenh angkew aletharl akaltyerr-aynteyew. Aleyanap arrantherr ampa akely-apenyarl, aletharl artneyel aylpatyew. Aylpaty-angkwarr rernem rlterrkarl ilkwerrem. Akngey-wenh angka ranap alakenh arrpemar. Aleth-antey arrantherr iterr-ayntem, ikwer akaltyerremel, arrantherrap rlterrkerremarl. Alakenhap arrantherr aleth renh apenterl-anenty, apmwa ipmemel. Akngeyelan arrenhantherrenh ipmewety itethelem. ³ Arrantherr kel iterl-areyel, Jesus Christ ran athamerreyel arrewantherr, arntarnt-areyel arrenhantherrenh intem.

Arrer anaynteyew Jesus-warl

⁴ Atha arrenhantherrenh angkanem ilem artwernem-akert, warlan mpwarew apwert-penh. Rerneman arrernew apwert ilkwa mwerr-angker anyent-tangkwel. Apwert nhenh anyent rap impenarl. Ranap apwert iteth rtnerl-anenty-apeny. Apwert ingwer-rneman

rernem pweytelew apwert yanh impen ikwer-warl. Anantherran Jesus Christ-then alakenh-anyemarl. Ranap apwert impen ikwer-apeny. Ingwer-rneman iterrenh, Jesus ra arrangkw-apenyarl. Akngeyelanap renh rlwanew impenarl. Alakenh-anyeman anantherr ingkerrenharl Jesus ikwer-warl pweyterrem. ⁵ Kel apwert-rnemarl pweyteleman-apeny, warl mpwareyew, Akngey-wenh Inwengel ra arrenhantherrenh pweyteleman Jesus-warl, warl impen Akngey-wenh mpwareyew. Arrantherr artwa ingkart-rnem-apeny aneyel, awank-akerrarl rernem aker ampernenh-apeny, ikwer-warl-athek. Ranap inkwerelheyen arrewantherr, arrantherrarl Jesus Christ nakeyew intem. ⁶ Alakenh-anyem artwa angkakertan Isaiah-el angka Christ-akert ingkwernew pwek Akngey-wenh-itwew:

“Athan atyenh-antey rlwanew,
apwert impen weth-apeny.

Athap apwert renh arrernew tawen Jerusalem-itwew,
apwert ilkwa ikwer-itwew itnan Zion.

Apwert yanh-itwew athan warl rlterrk mpwarem.

Arrantherran Jesus renh apentem,
arrantherrap anem rlterrk inngey warl yanh-apeny.

Nthakenh ingwerentyel arrenhantherrenh nyerrel-anthey-angenh-anem.”

⁷ Arrantherr iterreyel Jesus Christ ikwer, arrantherrap renh iterl-areyel mwerr inngarl. Ingwer-rnemelan renh iterl-arey-angenharl. Rernemap iterreyel apmwew-athen ikwer.

Akngeyan alakenh-anyem angkeyel pwek ikwerenhel:

“Warl artey-angker-rnemelan warl artenh apwert-penh,
rernemap apwert renh impen iwewarl,
apmwew-athen.

Ranap impen inngey ingkerrenh-angkwarrarl!”

Isaiah-elan alakenh arrpemarlngkwernew: ⁸

“Rernem apwert renh iwew,
ranap akngerr ankerteweyel-anem.

Rernemap aytneyel-anem, nyerr-anthelheyel-anem, irrwernelhemel.”

Kel alakenharl aynteyel angka Akngeywenh away-angenh-rnemewan. Akngeyel awank-akerr ilenh, alakenh-anyem ikwer-rnem aynteyenhan.

⁹ Akngeyelan arrenhantherrenh rlwanew, ikwerew atnyen-aynteyew, mwerr-angker arraty inngarl. Arrantherr anenh atemwengkel-tangkwel, apmwangkwarr apentenh. Aleyan arrantherr aneyel lyenentyel-anem, Akngeywenh-angkwarr-anem apenteyel. Ikwer-anem arrantherran warrkerreyel aleyan, artwa ingkart yanh-rnem-apeny. Arrantherrap ingkerrenh-antey ileyew, Akngey ran mwerrarl.

¹⁰ Awank-akerran arrantherr anenh alehang-rnem-apenyarl, Akngey iterl-arey-angenharl. Arrantherran aley inweng anthelhew Akngeywarl, ikwerenh-rnemarlap aneyelan. Awank-akerran arrantherr apatemel anenh, Akngey iterl-arey-angenh, ra arrewantherr ilkelhenharl. Arrantherran kel iterl-areyel-anemarl, ran arrewantherr ilkelheyel-anem artewentyel.

Rap athamerremel-anem arrenhantherrenh arntarnt-areyel.

Aleth-antey arraty-angkwarr anaynteyew, ingwer-rnemelarl areyel-wety

¹¹ Atyenh-rnemay! Mwerranty awelheyew! Aleyanap arrantherr alethang-rnem-apenyarl aneyel ahern nhenh-itwew. Ingwer-ingweran arrantherr alpeyenh irrwerl-warl, Akngey-itwel aney-alpeyew. Aley arrantherr ahern nhenhel-antey aneyel, arrantherr apek iterrem, apmwel-ayeth-antey alheyew. Athan arrenhantherrenh ileyel, rlterrk-antey anaynteyew. Arrantherr mentyarl apmwangkwarran ipmeyew, inweng alpwelyerrewerr. ¹² Ingwer yanh-rnem Jesus apentey-angenh-rnem, rerneman apmer arpanenhel aneyel. Rerneman arrenhantherrenh aleth areyel. Rernemap irrtywerremelarl arrangkwel ilem, arrenhantherrenh ayntarrp-ilemel. Rerneman tyel-angkem arrewantherr apmwel-ayeth. Mentyaw, artewenty iterrey-angenh! Aleth mwerr-angkwarr anaynteyew, rernemarl areyel-wety. Arlta ikwerelan, ingkerrenharl arrwekelel rtneyenh Akngey-warl-athek, rap renh-rnem ayernerl-aneyenh, judge-larl court-itwew ayernem-apeny. Rerneman iterl-areyenharl, arrantherrarl anenh arraty-angkwarr. Rernemanap Akngeyarl nakeyenh arrewantherrew.

Awelheyelarl artwa ilkwa kapment-areny-rnemew

¹³⁻¹⁴ Ahern nhenh-itwel aneyel artwa ilkwa kapment-areny akngerr, atyetyart arrewantherr.

Arrantherr ikwer-rnem awelhemer. Awelhenh-arey, rernemarl arrenhantherrenh ileyel-angkwarr. Atyetyart ilkwa Rome-areny ranap ilkwa aneyel apmer arrpanenhew. Rap ingwer-rneman arrernew, atyetyart anaynteyew apmer ingwer-rnem-itwew. Warrk ikwer-rnem-wenh alakenh-anyem aynteyel: irrwerney-angker-rneman akwerneyew tyayl-itwew, ingwer-rneman nakaynteyew, rernemarl mwerr-angkwarr aneyel-rnemarl. ¹⁵ Alakenh-anyem ingkerrenhel areyew, arrantherr arraty aneyel, Akngeyelarl ileyel-angkwarr. Rerneman akwerrp, nthakenh arrenhantherrenh ayntarrp-iley-angenh arrangkwew. Aleth arrantherr anaynteyew Akngey-angkwarr, arrantherrap renh-rnem akeleytelemarl.

¹⁶ Arrantherranap Akngey-wenh-rnem-anemarl. Ran arrenhantherrenh irrarkew apmwepenhan. Arrantherranap nthakenh alhewer alhey-angenh-anem. Nthakenh alakenh iterrey-angenh: “Mwerr anantherr iterrem apmwangkwarr alyepelan, Akngey-wenh-antey anantherr aneyelarl.” Menty, alakenh-weny. Arrantherr warrkenh Akngey-wenh-rnem, arrantherrap aleth ikwer-angkwarr apent-aynteyew. ¹⁷ Aleth mwerr-angkwarr anaynteyew, ingwer-rnemew ahelerrey-angenh. Awelh-aynteyew ilkwernemew, atyetyart ilkwew-then Rome-arenyew. Aleth ilkelh-aynteyew Christian ingwer-rnemew-then, arrewantherrenharl aneyel-apeny-rnemew. Aleth Akngey nakaynteyew, inkwerelhemel ikwer arraty-angkwarr.

Warrkenh-rnem awelheyew atyetyart ikwer-rnem-wenhew

¹⁸ Artwa warrkenh-rnemay, ayeng angkeyel-anem arrewantherr-warl. Arrantherranap atyetyart-rnem-wenh, awelheyew ikwer-rnem. Atyetyart anyentan atham-atham, ranap mwerrarl aneyel warrkenh ikwerenh-rnemew. Atyetyart ingweran ranap ahelengkwarl, renh-rnem warrkemelevel artewentyel inngey. ¹⁹ Atyetyart ingweran ahelerrem, rap arrenhantherrenh atwem arrangkwewarl. Arrantherran arwa aleth Akngeyewant iterr-ayntenh-arey. Arwa arternp anayntenh-arey, angkep ahelerrey-angenh ikwer. Alakenh-anyeman Akngey ran inkwerelhem arrewantherr. ²⁰ Atyetyart ingwerelan arrenhantherrenh atwem, arrantherr apekarl arnernkeyerrenh. Alakenh-anyemarlapp ran aynteyel. Arrantherr anem arternp, ahelerrey-angenh anterrey-angenh. Arrantherr apek apmwangkwarr-tangkwel anenh, nthakenh ingwerentyel arrenhantherrenh mwerr antwey-angenh. Arrantherranap artewenty ikwer warrkerrey-angenharl! Arrantherr innga apek atyetyartewan ikwer awelhenh, artewenty inngarlapp warrkerrenhan. Ra apek arrenhantherrenh atwenh arrangkwel, inngarl. Arwa arternp anayntenh-arey, anterrey-angenh. ²¹ Arrantherr alakenh-anyem anem, Akngeyelan arrenhantherrenh mwerr-angkerarl antwem. Jesus Christ ranap apmwangkwarr aney-angenharl, rernemap renh atwew alhewerarl. Renhap atwew

ipmew-anteyarl, arwa arrangkwel. Rarl katy ilwewan arrewantherr. Aleyan Akngeyan ilkelheyel, arrantherr renh iwarrerneyew, mwerr-angkwarr anaynteyew Jesus-angkwarr.

²² Akngey-wenh pwekel Isaiah ran alakenh ilew Jesus-akert:

“Ranap apmwangkwarr aney-angenharl, irrtywerremel iley-angenh.”

²³ Ingwer-rneman tyel-angkenh Jesus ikwer, raw tyel-angkey-angenharl ikwer-rnem angkep, arrangkwarl. Rernemap renh kwanthenh arrkent, ranap arrangkwarl arternp anenh. Rerneman renh atwenh, irrwampenh-anthenh. Ranap renh-rnem angkep atwey-angenharl, arrangkw. Ran renh-rnem menty ipmew, ran iterrenh Akngeyewant. Rap kel iterl-arew, Akngeyelarl renh mwerr antwew. Akngeyel ran ingkerrenh rlwaneyenh, renh-rnem court-emelerl-aneyenh. Rap mwerr-rnem amenteleyenh, apmwerneman amenteleyenh arrpemar.

²⁴ Jesus ranap apmwangkwarr aney-angenharl, ran katy ilwew anewantherr arwerl iylpeyl-atherrel. Rarl ilwew-angkwarr, anantherrap ipmelhem-anemarl, apmwangkwarr-wetyan arraty-anem anem. Aleyan arraty-angkwarr-anem anenheyew. Akngeyel anenhantherrenh arratyelew-anem, aleyanap anantherr ikwerrenh-rnem-anem aneyel.

²⁵ Arrantherran renh iterl-arey-angenharl awankan. Arrantherr yep-yep-rnem-apeny anenh, aperrerterrrenh. Aleyan ra arrenhantherrenh akngey-alpew-anemarl angkep ikwer-warl. Ranap thakeman-apenyarl,

arntarntarl-areyel yep-yep-rnem. Ranap
 arrenhantherrenh arntarnt-areyel irrkaty-
 angkwarr.

3

Anewart-rnem-akert

¹⁻² Arelh anewart-rnemew arrewantherren-
 anem ayeng angkeyel. Arrantherran
 awelheyew artwa anew arrewantherrenhew,
 warrkenh-rnemarl awelhem-apeny artwa
 ilkwernemew. Arrantherr Akngey-angkwarr
 iterreyel, anew arrewantherrenh apek
 iterrey-angenharl Akngeyewarl. Mwerr
 mentyaw, Akngeyewant anaynteyew. Anew
 arrewantherrenhel arrenhantherrenh areyelarl,
 nthakenh arrantherr aneyel. Arelh-rnem
 arrantherr Akngey-angkwarr anenty, anew
 arrewantherrenhew mwerr-angkwarr anemel,
 rernemap inweng anthelhem apek Akngey-warl.

³ Arelh ingwer-rnemelan ilek-ilek arrernem
 alta ikwer-rnem-wenh-warl, mwerr-angker
 mpwarelhemel. Ingwer-rnemelan nikeletharl
 arrernem itewarl, itep-warl arrernem mwerr-
 angker gold-penh, arnkwel-akerr mwerr-
 angkerel aylpemel. Rerneman iterreyel,
 "Alakenh-anyeman ayeng mpwarelheyel mwerr-
 angkerarl."

⁴ Rernem-apeny alakenh aney-angenh.
 Arrantherr mwerr-angkwarr anenty, mwerr-
 antey angkerl-anemel ingwer-rnem-warl
 athamerremel ikwer-rnem, Akngeyanap ra
 iterrem alakenharl, "Arelh nhenh-rneman
 mwerrarl, arraty inngarl."

⁵ Iterrenh-arey arelh yanh-rnemew, rernemarl anenhew awank-akerr. Alakenh-anyemarlapp rernem, anenhan awank. Rernemanap aleth Akngeyan nakenh, aleth ikwerant iterremel. Rernem awelhenharl anew ikwer-rnem-wenhew. Alakenhelap rernem mpwarelhenh mwerr-angker. ⁶ Arelh anyent itna Sarah, Abraham-wenh anewikw. Sarah ranap awelhenharl anewikw ikwerenhew Abrahamew, "Atyengew-artey mwerr-angker" antwemel. Arrantherr apek anenty irrkaty-angkwarrantey, arrantherranap ampikw ikwerenh-rnem-apyen anem. Alakenhap arnkatyarl alhewer arrantherr anem, atererrey-angenh.

⁷ Artwa anewart-rnemew arrewantherr-anem ayeng angkeyel. Mwerr anenh-arey arelh arrewantherrenhew athamerremel. Mwerrantey angkenh-arey, ahelerrey-angenh, arweltheney-angenh. Arlka arelh-rnem-wenh riterrk-wenyarl, artwernem-wenhan riterrk inngarl. Alakenh-anyemanap arrantherr renh-rnem arntarnt-araynteyew, atwey-angenhel. Arrantherr atwenty arelh arrewantherrenh, Akngeyelan nthakenh arrenhantherrenh away-angenh-anemarl, arrantherr renh ayernerlanentyan. Ranap Akngeyan mwerrarl anem arelh-then artwethenew irrkaty-angkwarr. Ranap iwerr anewantherr mpwarew ingkerrenhew, anantherr alpeyew, ikwer-itwel intem-antey aney-alpeyew.

Ingwer-rnemel aharl mpwareyel

⁸ Athan arrenhantherrenh ingkerrenh ileyel, arrantherraw iterl-araynteyew.

Arrantherrap athamerremel anaynteyew mwerrant-arey. Anyent amperrngerremel aneyel, arrantherr ingkerrenh athamerr-aynteyew ikwer. Alakenh-anyem mwerrant-arey anaynteyew. Ingwer-rnemew tyel-angkey-angenh anaynteyew. Nakelhey-angenh. ⁹ Ingwerentyel arrenhantherrenh iltem, mentyaw angkep renh-rnem iltey-angenh. Ingwerentyelan arrenhantherrenh atwem, mentyaw angkep renh-rnem atwey-angenh. Ingwerentyelan arrenhantherrenh arrarletyel iltem, menty-antey angkep renh-rnem arrarletyel iltey-angenh. Mwerranty mwerr-angkwarr ikwer-rnemew angkaynteyew. Mwerr-angkwarr ikwer-rnemew anaynteyew. Akngeyel arrenhantherrenh rlwanew ikwer. Alakenhap arrantherr mwerr-angkwarr anemer. Akngey ranap arrewantherran mwerrarl anem. ¹⁰ Alakenh aynteyel Akngey-wenh pwekel: “Ingwerenty ilkelheyel, inkwerelhemel anaynteyew mwerr-angkwarr, ranap ingwerew apmwangkwarr tyel-angkey-angenharl. Ranap nthakenh irrtywerremel angkey-angenh ikwer-rnem, arratyant angkemel inngangkwarr. ¹¹ Rap angkepperremmer apmwangkwarr-wety, mwerr-angkwarr arraty anemel, mwerrant-arey anemer ingwer-rnem-akert. ¹² Akngeyelan ikwerenh-rnem arntarnt-areyel, rernemarlarl arraty-angkwarr aneyel ikwer. Rernemarlarl Akngey ayerneyel, ran awelheyelarl ikwer-rnem.

Ingwer-rnemarl apmwangkware aneyel-rnem,
ran intwemelerremarl ikwer-rnem-wety.”

¹³ Kel arrantherr innganem aley
arrkernelheyel, arraty-angkwarr aneyew.
Ingwer-rnemelan arem-anemarl, nthakenh-
anemarl irrwerney-angenh arrenhantherrenh.

¹⁴ Ingwer-rnemelan aleth irrwerney-angkerarl.
Rerneman tyel-angkem apmwangkware
arrewantherr, rlterrkelemel. Mentyaw,
artewenty iterrey-angenh! Akngeyelan
arntarnt-arem arrenhantherrenh ingkerrenh.
Ranap arrenhantherrenh aletharl mwerr
mpwareyel, rlterrkelemel. Ingwer-rnem-
wety atererrey-angenh. ¹⁵ Jesus Christ ranap
impen inngarl. Aleth ikwerant iterremel
anaynteyew. Ingwer-rnemel arrenhantherrenh
ayernem, “Ilekew arrantherr inkwerelhemel
Jesus apenteyel?” Alakenh-tangkwel arrantherr
iterreyew mwerranty. Arrantherr tyerneyew
arraty-angkwarr-tangkwel, rernemaw anaynt
awayew. Angkenh-arey arrantherr arternp-
mernt, nakelhey-angenh. ¹⁶ Akngey ran awayel
arrenhantherrenh, arrantherrarl angkeyel.
Apmwel-ayeth angkey-angenh, arrantherr-antey
nyerrel anthelhwerr. Ingwer-rnem, rernemarl
tyel-angkeyel Christian-rnemew, rerneman
arrenhantherrenh awem, mwerr-angkwarr
angkerl-anenty, rernemap nyerrerrem-anem.

¹⁷ Arrantherr apekarl apmwelhelemeng-arey,
ingwer-rnemel arrenhantherrenh irrwernem ar-
rpemarl. Alakenh-anyemarlap ra apmelerr
aynteyelan, arrantherr-anteyarl apmwelhelew.

Rernem apek arrenhantherrenh irrwerneyel, arrantherrarl mwerr-angkwarr aneyelew. Mwerrarlap ran, arrantherrarl angkep ahelerrey-angenh ikwer-rnem. Akngeyan arrewantherr inkwerelheyel, arrantherrarl ikwer-angkwarr aneyelew.

¹⁸ Iterreyew angka Jesus Christ-akertewanem. Rernem arrenhantherrenh irrwampenh-antheyel, rernemarl Jesus renh irrwampenh-anthenh-apeny. Ranap artwa mwerr-angkerarl, apwelelhey-angenh anenh, rernemanap renh atwew ipmew-antey. Rap katy ilwew, apmwa anewantherrenh akngeyew, anenhantherrenh anyenteleyew Akngey ikwer-warl. Arlka ikwerenh ywerrew, Akngeyelan inwengan ikwerenh itethelewarl.

¹⁹ Apmer ingwer-itwew Akngeyel awayaw-rnem atnyeneyel tyayl-itwew-apeny. Jesus ra apmer ikwer-warl alhew, renh-rnem angka mwerr-angker ilerl-alpeyew. ²⁰ Rernemanap arrwekeleny-rnemarl, artwa Noah-arl anenhang-areyarl. Akngeyan mpwelhenh ikwer-rnem, angkep alpeyew ikwer-warl. Arrangkw! Rerneman awelhey-angenh ikwer. Anyent rant Noah-ant awelhenh ikwer. Rap rtnwa ilkwa artenh. Ikwerenh-rnemant aylpew rtnwa ikwer-warl, 8-ant. Akngeyelarl kwaty ilkwa thwew, rernemantarlap rtnwa kwenel iteth anewan kwaty atnyerr-angkwarr. ²¹ Kel alakenh-anyemap Akngeyel anenhantherrenh iteth atnyenem. Anenhantherrenh baptise-emelemarl kwaty-warl, kwatyelanap anenhantherrenh artenhem, kwaty atnyerrelarl arrwekeleny-

rnem artenhew-apeny. Ilekew anantherr kwatylarlan aylpeyel? Ahern arlkepenh irrarlkeyew? Arrangkw! Alakenhap anantherr Akngey renh ilem, anantherrarl anthelhem ikwerwarl, apent-aynteyew ikwerenh-angkwarranem. Aleyan anantherr nyerrerrey-angenh-anem, Akngeyelarl anenhantherrenh irrarlkew apmwewety. Ran anenhantherrenh itethelew, Jesus renharl itethelew-apeny ipmepenh.
²² Jesus ran alpew irrwerl-anem, aney-alpeyew Akngey-itwel. Aleyanap ra aney-alpew ilkwanem, chair ilkwitwew aneyel Akngey-itwew arraty-ampeny, arawerrng ilkwakert. Ranap ilkwarl ingkerrenhew aneyel; antyerlrnemew-then, inweng apmwernemew-then, atyetyart ilkwernemew apmer arrpanenh-areny-rnem-akerr. Ranap arawerrng ilkwakert ingkerrenh ikwer-rnem-angkwarr.

4

Mwerr-angkwarrarl aneyel Akngeyew

¹ Arrantherran iterl-areyel, ingwer-rnemelarl Jesus irrwernew, rarl anenh ahern nhenh-itwew. Rerneman renh artewentyel atwew, ranap anenh arternparl, angkep atwey-angenh. Ran rlterrk-antey anenh, Akngey-wenh iwerr-angkwarrant iterremel. Arrantherranap Jesus-apeny anaynteyew, ingwer-rnemelarl irrwerneyel-wety. Alakenhap arrantherr rlterrk innganem irrem arnkaty-then. Atwenty-penh arrenhantherrenh, arrantherrap iterrem Akngeyewant-anem, apmwangkwarr-wety

intwemelerremel. ² Arrantherranap aleth Akngeyewant-anem iterremel aneyew, aley awelhemel ikwerant, apmwewety intwemelerremel. Arrewantherrenh-angkwarranap alhey-angenharl.

³ Awankan arrantherr ilek-ilek apmwangk-warr anenh, Akngey iterl-arey-angenh. Arrantherrap alhewer alhenh, arrantherrarl ilkelhenh-angkwarr, nyerrerrey-angenharl. Arrantherrap mpweny ayntenh ingwer-wenh anew-itwew, terangerrenh, alhewer atwerrenh arwelthel-then. Arrantherrap perayerrey-angenh Akngey-warl-athek, arrangkw. Ampwal apmwernemew arwerl-penhew apwert-penhew-then arrantherr perayerrenharl. ⁴ Aleyanap arrantherr Jesus-ant-anemarl apenteyel, alakenh-angkwarr-anem irrey-angenh. Ingwer-rnemanap aley aletharl apmwangk-warr-antey aneyel. Rerneman tyel-angkeyel-antey arrewantherr. Arrantherr apmwa ikwer-rnem-angkwarr aney-angenh, arrangkw-anemarl aleyan. Rernemanap arrkental ileyelarl arrenhantherrenh alakenh angkerremel, "Ilekew rerneman anantherr-apeny aney-angenharl, mpweny ayntey-angenh ngkwarl-then antywey-angenh?" ⁵ Ingwer-ingweran Akngeyel rap ingkerrenh rnerneyenh. Iteth-rnem ipmernem-then anantherr ingkerrenhan ikwer-warl arrwekel rtnerl-aneyenh. Rap ayernerl-aneyenh ingkerrenh anyentarl-anyentarl alakenh: "Nganangay anenh arraty-angkwarr, mwerr?" Ingwer-rneman ilelheyenh ikwer-warl, apmwangk-warrarl

anenh, rerneman awelhey-angenh ikwer.
 6 Akngey ran iterreyel, ingkerrenh-antey ikwer-
 itwel intem-antey aney-alpeyew. Alakenh-
 anyem ra ingwer-rnem thwenew, angka
 mwerr-angker ikwerenh ingkerrew ilerlap-
 aynteyew, iteth-rnemew ipmernemew-then. Rap
 ingkerrew arternp mpwelheyel, apmwewety
 intwemelerreyew anthelhemel. Alakenh-
 anyeman arrwekeleny-rnem rernem ikwer-
 itwel intem-antey aney-alpem. Kel-anem
 inweng anantherr ingkerr-wenh rapenyant-arey
 itetherrem Akngey-wenh-angkwarr.

Mwerrant-arey anayntenh-arey

7 Arltan arrer-anem irreyel, alker-
 thenan ahern-then ingkerrenh ywerreyenh,
 arrangkwerremel. Arrantherran alakenh-anyem
 arraty alhaynteyew, mwerranty iterreyew
 Akngey-angkwarran, ingwer-rnemew-then
 iterreyew, arrantherraw perayerr-aynteyew
 arraty-angkwarr. 8 Angka nhenh ranap impen-
 antey anewantherr rlterrk inngey: arrantherr
 ingkerrenhan artewentyel rwewarrant-arey
 ilkelherr-aynteyew, apmwangkwarr arrantherr
 anenh-penh. Aleyan arrantherr nthakenh
 angkep awakelhey-angenh atweyew, arrangkw.
 9 Christian ingwerenty alhenty apmer ngkwenh-
 warl, ntwarenh irrentey-angenharl, mentyarl
 ntwareyew. Menty ra amern ngkwenh
 arlkwem. Menty ra ankwayntem apmer
 ngkwenhel. Artewenty iterrey-angenh,
 menty. 10 Akngeyelan anenhantherrenh
 rlterrkew, anantherraw ingwer-rnemew

warrkerr-aynteyew. Rap anenhantherrenh anthew arawerrng ingwerek-ingwer anyentarl-anyentarl. Anyentan arawerrng-akert aneyel, ingweran arawerrng ingwer-akert arrpemar aneyel. Ingkerrenhan warrkerremer itengant-arey arawerrng ikwer-rnem-wenh-akert. Alakenh-anyeman anantherr ingkerrenh rlterr innganem irrem. ¹¹ Akngeyelan ingwerenty arawerrng anthew, akalty-anthaynteyew angka ikwerenhew. Kel ra ilaynteyew anaynt-antey, Akngey rarl angkeyel-apeny. Akngeyel ingwerentyakan arawerrng anthew, ingwer-rnem arntarnt-araynteyewarl. Kel ra ingwer-rnem arntarnt-araynteyew mwerr-angkwarr, Akngey-wenh Inwengelarl renh rlterrkeleyel. Arrantherr warrkerreyel alakenh-anyem, ingwer-rnemel arrenhantherrenh aremarl. Rernemanap angkerrem, “Nakemarl Akngey! Inngarl nhenh-rneman aneyel arraty Jesus-ew!” Anantherranap aleth nakaynteyew Akngeyan, rant atyetyart ilkwarl aneyel. Inngarlap ran.

Rlterrkarl ayntemeng-arey

¹² Atyenh-rnemay! Ingwer-rnemelan arrenhantherrenh irrwerneyel-antey. Rernemanap arrkent mpwareyel, arwa irrwampenh-antheyel arrenhantherrenh. Arlkanap arrenhantherrenh alpwelyeyley inngarl, arranther-ranap ayernerrem-anem, “Nthakenh-anem irreyelay? Akngeyelanangay innga anenhantherrenh iwerlelpew?” Arrangkwaw! Akngeyelan nthakenh arrenhantherrenh iwerlelpey-angenh. Ran alakenh iterreyel, “Rernem in-

nga rlterrk anayntem, rlterrkarl ayntemeng-arey? Rernem apek intwemelerrem atyeng-wety?” Alakenh-anyemap ra arrkerneyel arrenhantherrenh, arrantherr renh aleth apent-aynteyew. ¹³ Ingwer-rnemel aley irrwerneyel arrenhantherrenh, irrkaty-angkwarr arrpemarlrernemarlr Jesus irrwernenh-apeny. Ingwer-ingweran ra apetyeyenh arawerrng ilkwakert, ingkerrenhelap renh areyenan. Arlta ikw-erelanap arrantherr inkwerelheyenh. Kel arlka alpwelyerrey-angenh anaynteyew. Mwerr-angkwarr anaynteyew inkwerelhemel. ¹⁴ Aleyan ingwer-rnemelan arrenhantherrenh areyel, arrantherrarl Jesus apenteyel. Aleyan rernem arrenhantherrenh nyerrel-antheyel, arrarletyethen ilteyel. Ranap Akngeyel arrenhantherrenh Inweng Mwerr-angker ikwerenh antheyel, irrngerney-anthemel mwerr-angkwarrarl. Arrantherrap arternp anew-aneyel, arralty-aney-angenh-anem.

¹⁵ Ingwer-rneman ipmew-antey atwey-angker. Ingwer-rneman irrtiyert-awarrarl. Ingwer-rnemelan apmwa mpwarey-angker atwerremelthenarl. Ingwer-rnemelan warrk ingwer-rnem-wenh anngangey-angkerarl. Alakenh ikwer-rnem-angkwarr aney-angenh, menty! ¹⁶ Arwa aleth-antey arraty-angkwarr aneyew Jesus-ewarl. Ingwer-rnemel arrewantherr-warl apmwa akngetyenty, arrantherr Akngelyant nakemel anaynteyew. Arrantherran arraty-angkwarr aneyel, arrantherrap nyerrrerrey-angenh-anemarlr anaynteyew. Akngeyel arrenhantherrenh rlwanew, ikwerenh-rnemant

anaynteyew ikwerew.

¹⁷ Aleyanap Akngeyel ingkerrenh arrkernemel areyel, rap ikwerenh-rnem-tangkwel ayernerl-aneyenh, "Mwerrang arrantherr anenh?" Anantherran apek apmwelhelenh, ranap anenhantherrenh atweyenharl. Anantherranap itethantey anerl-aneyenh. Akngey rap ingwer-rnemarl-anem ayernerl-aneyenh, "Mwerrang arrantherr anenh?" Rerneman apmwangkwar anenh, rap renh-rnem artewentyel atweyenh. Rernemap ipmantey anerl-aneyenh. Akngey rap ingkerrenhew-anem alakenh ayerneyenh.

Alep nthakenharl ingwer yanh-rnemewan, Jesus-ew awelhey-angenh-rnemewan? Anewantherr-angkwarran aley ra renh-rnem innganemarl irrwamperl-antherl-aneyenh artewentyel innganem. ¹⁸ Alakenh-anyemarl ap ra Akngey-wenh pwekel aynteyel:

"Rap rlterrk inngarl aynteyenh arraty-angkwarr aneyel-rnemewan.

Akngeyelanap renh-rnem arntarnt-areyenharl.

Alep nthakenh yanh-rnemewan aynteyenh, apmwangkwararl aneyel-rnemewan, Akngeyew awelhey-angenh-rnemewan?

Arlta ikwerelanap ikwer-rnem rlterrk inngey aynteyenh.

Akngeyel renh-rnem irrwamperl-antheyenh artewentyel inngey."

¹⁹ Rarl Akngeyel arrewantherr-warl apmwa tyarlewem, arrantherr renh iwerl-alhey-angenhharl. Aleth arrantherran arraty-angkwarr-antey anayntenh-arey, ikwerewant

iterremel. Ran arrenhantherrenh mpwarew, rap angkew, ra arrenhantherrenh intem-antey arntarnt-araynteyew. Ran ilek-ilek mpwareyel arrewantherr, rarl arrwekel-antey iterremel ilew-angkwarr. Ikwerenh-angkwarran mwerrarl. Alakenh-anyemarlap arrantherr mwerr-angkwarr anayntenh-arey arraty.

5

Angka nhenhan tyaty-areny ilkwernemew ingwer-rnemew-then

¹ Ayengan Peter angkeyel tyaty-areny ilkwernemew-anem, rlterrk-antey ilanthemel. Ayengan tyaty-areny ilkwa arrpemar, arrantherr-apeny arrpemar. Athan anngetherr arrpemar aytarenh, rernemar Jesus Christ ayntarrp-ilenh, renhap ipmew-antey atwew. Ingwer-ingwerap Akngeyel Jesus renh lwewarrerneyenh arawerrng ilkwakert ingkerrenh-warl. Arlta ikwerelanap ayengan alpeyenh, aney-alpeyew ikwer-itwel, amparrkerl-anenty intem-antey.

² Arrantherran tyaty-areny ilkwernemelan mwerrantyel Akngey-wenh-rneman arntarnt-araynteyew mwerr-angkwarr intem. Ra renh-rnem anthew arrewantherr, renh-rnem arntarnt-araynteyew, yep-yepew-artey-rnemelar yep-yep-rnem arntarnt-areyel-apeny. Alakenh arrpemar arrantherr tyatyew-artey-rnemelan renh-rnem aleth-antey arntarnt-araynteyew, rernem arraty-angkwarr anew-aneyew-awaty. Ingwer-rnem tyarlewerl-aney-angenh ikwer-rnem-warl, renh-rnem

irrwern-aynteyew. Arrantherr mwerr-angkwarr inkwerelhemel warrkerr-aynteyew, manewant iterrey-angenh. ³ Arrantherr atyetyart ahelengkw-apeny aney-angenh. Akngeyelan arrenhantherrenh arrernew, ikwerenhrnem arntarnt-araynteyew. Arrantherranap ikwerenhangkwarr anaynteyew. Alakenh-anyem ingwer-rnemel areyew, rernem aneyew irrkaty-angkwarr arpemar. ⁴ Ingwer-ingwer Jesus ra apetyeyenh angkep, ranap ilkwa inngarl aneyenh. Rap arrewantherr-angkwarr inkwerelheyenh, arrantherrarl warrkerrenh ikwer array-angkwarr. Ra arrenhantherrenh antheyenh ilngem mwerr-angker inngey arawerrng ilkwakert, rap aneyenh aleth arrewantherr-itwew.

⁵ Ayengan angkeyel arrewantherr artwa akely-rnemew, kwey aleyak-rnemew-then-anem. Arrantherrap mwanty awelheyew arternp tyatyew-artey-rnemew, rernemar angkeyelew.

Ayengan angkeyel-anem ingkerrenhew-antey. Tyak arrantherr nakelhey-angenh. Iylpareth-antey anyanteyew, rernemar ileyel-angkwarr. Christian-rnem arrantherr ilkwa ilelhey-angenh, nakelhey-angenh, arrangkw. Mwerrant-arey anaynteyew athamerremel. Alakenh-anyemap ra aynteyel Akngey-wenh pwekelan:

“Ingwer-rneman ilelhem mwerr-angker ilkwar-rpantey.

Akngeyelanap renh-rnem artwerelemarl.

Ingwer-rneman mwerr-angker-rnemarl aneyel, nakelhey-angenharl.

Akngey ranap mwerrarl aneyel ikwer-rnem.”

⁶ Alakenh-anyemanap arrantherr aleth awelhaynteyew Akngeyew iylpareth-antey. Arranther-ranap rlterrk-weny-rnemar, ran rlterrk inngarl. Ran arawerrng ilkwakertarl, rap arntarnt-areyel arrenhantherrenh. Ranap arrenhantherrenh ilkwa antwem, Jesus rarl apey-alpeyenhelan.

⁷ Apmwa arrewantherr-warl apetyenty, arrantherran artewenty iterrey-angenh anaynteyew. Arlka alpwyerremel aney-angenh. Akngey-warlant angkeyew apmwa yanh-wety, apmwa ikwer iylpellerremel-anem. Ran aleth arrewantherr amperrngerremelant aneyel, rap aleth ar-rpemar, arntarnt-arerl-aneyenh arrenhantherrenh.

⁸ Aleth iterr-aynteyew arraty-angkwarr. Arntarnt-arerr-aynteyew arrenty ikwer-wety. Ran arrkernelheyel, arrenhantherrenh ilpertelelheyew, intwemelerreyew Akngey-wety. Arrenty ranap arengk artnwer angayakw-apeny, akerewarl alheyel-apeny. Rap antwerrkem, renh-rnem ywerrelhelemel. ⁹ Rlterrk-antey Akngey-angkwarr anaynteyew, atererrey-angenh. Ikwerant iterremel anaynteyew. Arrantherranap iterl-areyel, apmwa rlterrk innganem aneyel Akngey-wenh-rnemew apmer arrpanenhel. Ingwer-rnemelan aha akngetyeyel-antey ikwer-rnemew, rernemar Jesus apenteyelew.

¹⁰ Alerl-antey apmwa rlterrkranap inngey arrewantherr aynteyenh. Apmwa rap ingwer-ingwerantarl ywerreyenh. Akngey ranap mw-

errarl arrewantherr aneyenh, arrenhantherrenh arawerrng ilkwa Christ-apeny anthemel, inweng arrenhantherrenh rlterrkeleyew. Rap arrenhantherrenh intem-antey atnyeneyenh artewentyel inngey arrer ikwer-warl. ¹¹ Ya, ran inngarl ingkerrenhew ilkwa aneyel, ranap atyetyart anerl-aneyenh ingkerrenhew intem-antey. Inngarlap ran alakenh-anyemarl.

Kel angka nhenh ywerrelhelem-anem

¹² Pip nhenhan arwa akely arrer-antey. Silaslan ayenh alpemelenh. Ranap Christian anantherr-apenyarl, rap Jesus apenteyel arraty-angkwarr, warrkerremel atyeng-itwew Akngeyew. Pip nhenh-angkwarran ayeng iterreyel, arrenhantherrenh rlterrkelemel irrngerney-antheyew. Akngey ran arrewantherr athamerremel anem. Aleth iterr-aynteyew ikwerant, angkepperrey-angenh.

¹³ Tyaty nhenh-areny-rnemelan apmer nhenh-itwew Rome-itwew rernem angkem “Mwerrangay arrantherr?” Rernemap apmer nhenh *Babylon* itnewem. Rerneman Akngey-wenh-rneman arrantherr-apeny arppemarl. Arrantherr artwa Mark iterl-arenh? Ranap alerey atyenh-apenyarl aneyel. Ranap nhenhel aneyel, rap angkeyel arppemarl, “Mwerrangay?”

¹⁴ Kel arrantherr ilkelhemel anew-aneyew mwerrarl. Arrantherrarl akarrerremel anem, mwerrant-arey angkerremel atnyenerreyew.

Ingkerrenh arrantherran Jesus Christ apenteyel-rnem, athan ayerneyel Akngeyan arrewantherr alakenh-anyem: “Akngeyay, ngan

arrer-apeny
rernemaw
anaynteyew.”
Kel-antey.

ikwer-rnem-warl
inkwerelhemel

anaynteyew,
mwerranty

Alyawarr Bible
Portions of the Holy Bible in the Alyawarr language
of Australia

copyright © 2009 Wycliffe Bible Translators

Language: Alyawarr

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2023-11-10

PDF generated using Haiola and XeLaTeX on 9 Mar 2024 from source files dated 10 Nov 2023

284d4e02-292d-5bd8-a8a6-8360a307b937